

61

HARVARD COLLEGE LIBRARY
FROM THE
HARVARD-YENCHING
INSTITUTE
APR 29 1930

~~Ch L 3203, 88~~

Ch L 3203 / 3142 / 88

江南通志卷一百四十九

人物志

宦績 十一 太廬鳳三府

太平府

唐陶大舉當塗人官宣州刺史以破徐敬業功封丹陽侯
轉懷州有德政鄉人立石頌之

宋郭維字仲逸當塗人大中祥符八年舉進士調泰州司
理叅軍治獄有能名歷知南豐新都部使者交薦除雅
州案貴戚王蒙正侵占民田事執法無貸移知常州民
健於訟維鈎索善訟者十餘人流之宿姦畏避擢淮南
提刑所部墨吏望風解去遷度支郎中卒弟經舉進士



知永泰縣時司馬光知諫院有謹以立身敏以從政之薦

羅彥輔字經世當塗人嘉祐四年進士調南城尉移江都令用薦除著作佐郎知湖口縣僚吏有告彥輔私受酒息於郡者守劉述卽以付吏或疑事小宜置之述曰羅湖口廉吏也不窮究其實終身被誣矣果得其誣反坐之歷知池州池居沮洳城善頽彥輔固石爲隄永絕水患移睦州卒鄉人欽其清德以姑溪水比之

石禹勤字力臣蕪湖人舉進士令靖安伐妖木祛淫祀郡守薦其能除通判辰州時章惇經畫南北人皆言南江蠻易勦禹勤獨請招徠北江皆相率聽命遷知建州

轉運使奏禹勤鹽課捕盜爲一路最移撫州卒黃庭堅表其墓

李檉字與幾當塗人宣和進士監察御史忤秦檜出知信州平貴溪妖賊檜抑其功鑄職歸州民畫像祀之尋以郊恩復官知睦州卒

元李叙字彥倫當塗人以薦授江寧教諭調建康書院山長節省浮費及去有羨粟千石書冊授代無私焉遷平江學政學歲租萬石上官委叙主出納尤以清謹聞子習翼

明陶安字主敬當塗人領元至正四年鄉薦爲明道書院山長太祖渡江至太平安迎謁因說曰四海鼎沸豪傑

蠶起皆志在子女玉帛未有撥亂救民者明公神武不
殺應天順人天下不足定也帝善之遂參幕府從克建
康命知黃州寬賦省役移知饒州平閩寇錫金帛洪武
初置翰林院首召安爲學士制度禮文多所考定又命
爲議律官律成拜江西行省參政卒於官追封姑孰郡
公

陶本字培之當塗人安族弟少師事安以博洽聞郡辟
校官不就舉經明行修帝御闕樓試以治平策本援筆
數千言皆切當稱旨擢工部主事才敏守潔克舉其職
俞仲衡字平甫當塗人洪武中以賢良薦授台州知府
值旱荒農乏穀種仲衡散官廩分給期以秋償民感其

德如約輸納無敢後者爲一時循良最時太拓都城役
未竣令諸臣運磚助工以清慎免者數人仲衡與焉

詹俊字用章當塗人洪武四年徵授磁州同知時兵革
初定民未復業俊勞來安輯之勸耕桑興學校舉賢能
祛奸弊州以大治遷汝寧通判

劉允字子允當塗人洪武辛亥進士授懷慶通判以佷
直謫瑞安縣丞多善政擢北平按察司副使允有吏幹
尤侃侃善議論每召對多稱旨

梁觀字大用當塗人洪武中貢入太學擢吏科給事中
遷四川按察司僉事調廣東分巡潮州廉介剛果決獄
如神卒於官潮人祀之韓山書院屢示靈異有禱輒應

杜智字仲才蕪湖人洪武中以太學生授隨州守有治聲坐逋稅當謫戍廷臣疏其廉特擢北平守永樂間累官南副都御史又同邑湯貞洪武中由太學生令曲江以清介聞永樂初改令寧海皆有政績

胡湜字景濂蕪湖人洪武中由太學生授吏科給事中廉直敢言永樂初歷廣東僉事值中璫監市舶多不法湜密奏逮治璫懼自殺後皆斂戢無敢驕恣

嚴升字仲升繁昌人建文庚辰進士由青神令累遷江西僉事以廉幹著歷副都御史振肅風紀進禮部尚書未任卒又同邑周原由進士歷磁州同知亦有廉明之頌

汪俊民繁昌人建文庚辰進士授御史永樂初出按廣東撫黎人之叛遷刑科給事中有聲諫垣

李衡字秉鈞當塗人永樂甲申進士遷庶吉士改戶部員外郎以廉慎爲尚書夏原吉所倚任遷湖廣叅政撫綏有方蠻獠帖服以原吉薦擢兵部侍郎衡品粹才優長於治劇所著有澹軒集

彭禮字時序當塗人永樂甲申進士選庶吉士改戶部員外郎吏才敏練銳於任事在部十餘年每堂官缺帝輒命禮攝之財賦出納悉有條貫

郭智字懋明蕪湖人永樂辛丑進士宣德中官御史聲望甚偉輔臣楊士奇等交薦之以僉都御史整飭寧夏

邊務軍肅民安進督兩廣威德益著

謝孚字以誠當塗人永樂丙戌進士授御史歷福建陝西副使所莅有聲中貴奉使過陝官吏多望塵伏謁孚獨長揖不屈後致仕歸子騫舉進士以御史出按兩浙鹽課置勢家子弟私販者於法終山東叅政

徐觀字大賓當塗人永樂乙未會試副榜歷刑科給事中糾劾無所避正統初轉雲南按察司僉事雪理冤獄舉廉斥貪以預平麓川功進副使又相度險要築堡濬池墾荒興屯邊患永息

吳琛字輿璧繁昌人景泰辛未進士授御史犒軍甘鎮巡按四川皆著風采天順初以劾石亨驕恣謫外尋復

職累擢僉都御史歷撫甘肅粵楚進督兩廣聲績尤盛琛頻莅重鎮歿無餘資人服其守

黃讓字用遜蕪湖人景泰甲戌進士官御史抗疏請釋直臣鍾同章綸於獄又論大內營繕不息財力耗竭諸事謫營山典史歷中府都事與倖臣錦衣門達忤爲所陷譴戍廣西達敗復官

楊璧字應奎當塗人景泰甲戌進士擢戶科給事中侃直有氣節天順改元以建言謫外適有天變特詔復官後守平涼鑿延安河溉田七千餘頃同邑鍾城璧同榜進士歷督福建江西學政凡所甄拔悉成令器

戴旭字敬熙蕪湖人天順中由太學生任武岡州同知

境內猺獞雜處兼有藩邸軍衛素號難治旭以廉敏著能聲移署靖州歷許州卒藉同官賻始克成殮

李蕙字德馨當塗人成化己丑進士授刑科給事中歷江西叅政南贛盜起蕙廣設方略擒其渠魁餘黨悉平南昌大水入城蕙恐官廩有失預給軍士月糧令竭力運負廩米立空人服其機敏累擢右都御史總督糧儲頻有建白漕規振肅

夏祚字天錫當塗人成化戊戌進士擢兵科給事中疏劾大臣之侵科臣權者歷江西布政丁艱解任襍被就道同官遣役賫美金追送祚捷役返金服闕補閩藩時巡方以墨聞面數之旋乞致仕閉門靜守并日而食歿

後遺一金帶乃銅爲之

汪宗器字鼎夫繁昌人成化甲辰進士授行人擢御史條奏多剴切出按楚粵薦賢斥貪大著風裁遷南大理寺丞進少卿善決疑獄以劉瑾撓法乞終養歸兄宗理舉進士官御史亦著直聲

李贊字惟誠蕪湖人成化甲辰進士授吏部主事轉員外以才守爲冢宰王恕所任改兵部郎復爲尙書馬文升所薦累官浙江布政以事忤劉瑾勒令致仕

李貢字惟正贊之弟與兄同舉進士授戶部主事歷刑部郎讞獄明慎累擢右都御史巡撫遼東總兵毛倫怙劉瑾勢恣橫貢以法裁抑之忤瑾罷歸瑾誅起撫順天

增修通州城費鉅而民不擾又築古北口邊垣以扼寇
衝遷兵部侍郎

胡燿字仲光蕪湖人弘治癸丑進士選庶吉士改戶部
主事嘗應詔陳言劾中官李廣楊鵬及戚畹方士傳奏
冗員之害詞意剴切直聲振一時會廣死故燿得無罪
九歲卽能詩長益博涉經史文筆雄偉有蒲塘集

祝鑾字鳴和當塗人正德戊辰進士授禮部主事歷郎
中同翰林舒芬等諫止南巡廷杖奪俸終福建叅政

喻智字子貞當塗人正德甲戌進士由部曹歷副都御
史巡撫南贛卽王守仁舊治地介閩廣大盜餘孽踞箐
穴結蠻獠時出爲患智開誠布信受撫者以萬計乞歸

後有柄臣僕過邑橫肆智執而杖之其嚴毅如此

端廷赦字世恩當塗人宏之孫正德庚辰進士令高安
以最擢御史劾武定侯郭勛驕橫巡茶馬按兩浙風采
益著累官南右都御史掌院事因近鄉里嘗有欲干謁
之者復憚其剛正而止

楊東字啓明當塗人嘉靖癸未進士授行人擢御史初
巡視廐牧及清查龍驤三衛盡釐侵冒宿弊巡鹽河東
清豪占鹺池逋課悉完繼按雲南多雪疑獄滇中頌如
神又土官爭襲仇殺巡撫議發兵進勦東傳檄諭之止
罪首惡事遂定

倪嵩字中卿當塗人嘉靖己丑進士授太常博士釐奉

常典禮輯總覽一書擢御史出按貴州裁正土官之挾微功求進秩者先是黔省鄉試附滇路險且遠嵩疏其事因特設黔闈試士士多便之遷大理寺丞又釐律令輯問刑條例一書遷戶部侍郎以忤輔臣嚴嵩出爲南右都御史尋乞休族孫一驥歲貢生學行深粹士林推重

徐貢元字孔賜繁昌人嘉靖辛丑進士自刑部郎出爲德安守多異政累遷南戶部侍郎總督糧儲歷官十三任清白無疵時海內有四君子之號貢元其一也所著有省身日記

周易字時伯蕪湖人嘉靖癸丑進士授兵部武選主事汰軍職冒濫二十餘人改御史救言官論邊務詞皆抗直督北畿學政輔臣以私書至易不閱而焚之歷參議致仕

孫濟遠字合溪當塗人嘉靖乙丑進士授饒州推官讞決如神擢御史出按黔蜀治尚威嚴不避勢要

梅淳字凝初當塗人隆慶辛未進士授縉雲令以政最入爲御史巡按浙廣多所糾彈因忤輔臣出守岳州遷濟寧道河決韓莊渠淳疏築有功擢雲南布政清理宿弊羨金悉歸公帑時開珠池商人例獻樣珠峻却之著有一鶴文集

陳一簡字上敬繁昌人萬曆癸未進士授戶部主事歷

郎中擢昌平僉事橫嶺有九陵奸弁妄議開採一簡力爭以橫嶺內近陵寢外薄敵營此役一興恐傷陵脉啓邊釁事乃止又正內璫在昌平非法殺人罪遷副使卒吳一驥字純所蕪湖人萬曆甲午舉人授耒陽令邑產錫苦供億特白撫按罷之遷湖州同知湖多盜皆倚勢家爲窟穴一驥窮治伏法盜遂絕迹歷戶部郎又同縣俞審由舉人知澧州澧多水患審築堤捍禦名文梁堤州人永賴

崔涓字震水蕪湖人萬曆辛丑進士授行人遷銓曹兩掌選政謝絕請屬人多服其清介

楊成喬字惟嶽當塗人萬曆辛丑進士授新興令敏於聽斷又知民素困郵傳之擾特取公帑給驛費擢戶部主事轉職方郎籌畫邊務悉中機宜尋告歸卒子芝瑞懷宗時由舉人令慶元據險設守擊敗賊兵遷武定知州

葛綱字振寰蕪湖人萬曆壬子舉人天啓末官國子監丞時魏忠賢竊柄黨附者倡議立祠并配享太學綱白祭酒力沮之忠賢敗綱遷刑部主事

曹履吉字根遂當塗人萬曆丙辰進士授戶部主事督新泰海運二倉釐剔積弊盡取羨米儲爲公用歷郎中出督河南學政兼縮諸篆河堤潰決捍築有功內擢光祿卿

張時暘字义若建陽衛人萬曆丙辰進士授岷縣令以捕治豪猾著能聲調臨海隣縣兵譁往諭立解擢禮部主事歷山東武德道僉事武德爲齊魯之交水陸輻輳地衝且瘠時暘拊以寬大境內輯寧

沈希韶字鳳來蕪湖人天啓壬戌進士授新昌令有能聲入爲御史出按上江先是沿江繁征蕪湖爲甚希韶巡視悉革其弊里人建坊頌德後例轉僉事未赴卒

國朝楊世學字爾合芝瑞子舉順治丁亥進士由評事擢御史有請嚴採買杜騷擾諸疏部覆允行又請濬淮河下流海口引水入海河患自息時論躓之出爲武昌分守道招撫山賊鄭鴻等十三砦歷衡永叅政所莅皆以清

操聞

方錫字禹符繁昌人順治戊子副榜令清流廉潔自砥纖芥無染遷沂州守未赴卒邑署所存惟敝衣一笥圖書數卷

徐鼎臣字調明當塗人順治己丑進士授鄆縣令地介豫閩素爲盜藪鼎臣始至披荆棘招流亡戶口稍增方籌兵料餉爲勦賊計遽以勞瘁卒官邑人悲之

韋一鶴字羽仙蕪湖人順治壬辰進士授麗水令邑多崇岡伏莽一鶴戢盜拊民四境安堵政績大著

汪可準字懸標蕪湖人父廷幹以篤行稱鄉里可準舉順治壬辰進士授永州推官莅事明銳案無冤滯入爲

中書舍人卒

韋嗣賢蕪湖人順治乙未進士授撫州推官剖決精敏
內擢吏部稽勲主事歷考功郎中清介有守居鄉尤以
仁厚得時譽

丁宗閔字再騫當塗人康熙己未進士授祿豐令邑遭
滇逆之變地荒民散宗閔買牛種招流移民皆樂業又
創義學課士自是科第相繼攝祿勸州事單騎諭降土
酋之抗令者以卓異徵值憂歸卒

廬州府

漢周榮字平孫舒人舉明經辟司徒袁安府凡安舉奏竇
景與竇憲爭立北單于事皆榮具草竇氏客徐齧深惡

之脇榮曰子爲袁公腹心之謀排竇氏竇刺客滿城中
謹備之榮曰江淮孤生蒙恩待備宰士縱爲竇所害誠
所甘心及竇敗榮由此顯名自郎令擢爲尙書令歷官
潁川山陽太守皆見稱紀以老病乞身卒於家詔特賜
錢二十萬

周景字仲饗舒人任河內太守好賢愛士其拔才薦善
常恐不及徵入爲將作大匠累遷司空時宦官任人及
子弟充塞列位景初視事與太尉楊秉奏諸奸猾自將
軍牧守以下免者五十餘人遂連及中常侍侯覽貝瑗
皆坐黜朝廷莫不稱之建寧元年薨追封安陽鄉侯子
崇嗣至甘陵相中子忠累遷大司農後代皇甫嵩爲太

尉錄尚書事忠子暉爲洛陽令

三國吳周瑜字公瑾廬江舒人父異爲洛陽令景從子瑜長壯有姿貌孫堅徙家於舒堅子策與瑜相友善瑜推道南大宅以舍策升堂拜母後將兵從策屢立戰功爲中護軍鎮巴邱權統衆瑜與張昭共掌衆事權討江夏瑜爲前部大督曹操入荊州瑜率程普等逆操於赤壁縱火燒擊大敗操軍拜偏將軍領南郡太守詣京見權謀進取蜀還江陵卒於巴邱權素服舉哀感動左右子循尚公主拜騎都尉有瑜風早卒循弟印拜興業都尉

隋樊子蓋字華宗廬江人仕齊封富陽縣侯隋高祖受禪以功改封上蔡縣伯煬帝時歷官武威太守以善政聞

大業九年車駕幸遼東命子蓋爲東都留守楊元感作逆盡銳攻城子蓋設備禦屢摧破之帝曰昔高祖留蕭何於關西光武委寇恂以河內公其人也進位光祿大夫封建安侯卒謚景會葬者萬餘人武威民吏聞之莫不嗟痛立碑頌德

陳稜字長威廬江襄安人大業中拜虎賁郎將擊琉球大破之虜男女數千而歸煬帝幸江都命統宿衛兵擊賊淮上往往克捷遷右禦衛將軍

唐羅珣廬州人爲本州刺史捐俸給藥濟貧修學勸士三年政化大洽有芝草白雀之瑞遷京兆尹封襄陽縣男子讓官至江西觀察使

宋馬亮字叔明合肥人舉進士通判常州吏民有因緣亡失官錢逮者數百人亮與期悉縱去不逾月盡輸所負糾察福建路刑獄活冤者數十人知饒州誅豪民白氏真宗卽位以侍御史上書言軍賞宜速給赦書蠲除逋負宜勅有司毋更趣責帝善其言爲四川轉運副使賊王均旣平而主將邀功誅殺不已亮言於帝悉宥之時諸鹽井久涸負課逮繫者州數百人亮盡釋之而奏廢其井又除屬部舊逋官物二百餘萬還知潭州移昇廣虔洪杭諸州入爲御史中丞請禁士民父祖未葬毋得析居後以太子少保致仕卒諡忠肅

馬仲甫字子山亮子舉進士知登封縣鑿轅轅道險阨爲坦途爲發運使鑿洪澤渠六十里以避長淮之險知瀛州築甘谷堡以通北抵南谷之路

鍾離瑾字公瑜合肥人舉進士知德化縣將嫁女市婢得前令女遂與己女同嫁判益州建言州郡旣上雨後雖凶旱多隱之以成前奏請令監司劾其不實者歷江淮制置發運使置厠召伯埭旁人以爲利累遷龍圖閣待制權知開封府卒

茹孝標舒城人天聖中進士少負氣節好學不倦吏治有聲仕至都官員外郎出知江州

楊察字隱甫合肥人景祐元年進士歷江南東路轉運使在部專以舉官爲務曰此按察職也苟掎拾羨餘則

俗吏之能何必我哉以右諫議大夫擢御史中丞御史何剡論事不實中書問狀察言御史故事許風聞今以疑似被詰問非所以廣言路也卒贈禮部尚書諡宣懿雙漸廬江人慶曆中進士博學能文爲職方郎中出知同州爲政和易吏民見思有古循吏風

賈易字明叔無爲人中進士甲科爲常州司法參軍自以儒者不嫻法令議獄惟合於人情曰人情所在法亦在焉郡中稱平歷宮侍御史以剛直名上書言天下大勢可畏者五頗激切易程頤門人與蘇軾不合嘗論劾之

張徵字新仲舒城人建炎三年爲御史中丞劾黃潛善汪伯彥大罪二十條罷知江州尋又謫祕書少監分司

西京

王藺字謙仲廬江人乾道進士歷樞密院編修官輪對奏五事孝宗大加獎擢除監察御史陳時政闕失皆嘉納之光宗卽位由禮部尚書遷知樞密院事除日或自中出未愜人心者輒留之納諸御座時議建皇后家廟力爭不可應詔疏列八事不報終以不合去

束元壽合肥人通城簿毀淫祠正風俗嘗攝縣令以政最聞後知秦州賑饑有法全活甚衆

元晁顯巢縣人泰定時爲平江路總管以廉自律杜請謁禮文學之士勞來阡陌絕奸吏詘大姓一時稱焉

江南通志 卷一百一十九
明薛祥字彥祥廬州人領衆來附太祖從渡江海州民亂
株連甚衆祥會鞫多所開釋治淮八年民相勸莫爲惡
咸寫真祀之授工部尚書時李善長奏鳳陽宮殿人匠
麗鎮將盡殺之祥面折之曰太師一言壞人命乃分別
無罪活數千人左遷北平布政使治行稱第一後坐事
杖死天下哀之

陳瑄字彥純合肥人洪武時累功授都督僉事永樂初
封平江伯領海運歲漕米百萬石至北京後旣開會通
河罷海運仍命瑄督漕瑄鑿清江浦築堤置牖漕舟便
之又改民運爲兌糧自瑄始卒諡恭襄廟食清江浦
蔚綬合肥人洪武中由國子生歷官山西布政司叅議

永樂間召拜禮部侍郎宣德初晉本部尚書綬秉心淳
實履行端方卒諡文肅

申泰無爲人洪武間以薦起家知延平府入覲會諸守
有以贓敗者傳旨令軍校遍搜各省知府至延平止得
米三升鈔二貫考天下清廉第二荷褒賜致仕歸惟攜
老蒼頭一人步入閭里

龍源合肥人少警敏力學永樂初預修大典授工科給
事中親喪家居見民牧不良卽聞於朝其人賂當道誣
之遂罷歸

方正合肥人永樂初徵修大典入太學授工部主事時
建北都督工規畫有條由屯田郎擢江西叅政平峒賊

江南通志 卷一百四十九
遷福建布政

丁毅字士弘無爲人永樂乙未進士選庶吉士性剛直時近臣有紀綱者勢傾中外衆莫敢忤毅獨正言與之抗綱服其直竟不能厄

史昭合肥人永樂初積功至都指揮僉事充總兵官鎮涼州討平土軍老的罕移鎮西寧請立學校如中土宣德中以征西將軍鎮寧夏凡十二年邊備大固進右都督

鄭泰字景暘舒城人永樂進士任給事中讜言動衆進都給事中超補刑部侍郎璽書褒異天順復辟遷吏部卒賜祭葬

朱昂字廷舉無爲人貢生任應天府通判陞工部郎周文襄忱薦領江南糧儲歷陞福建叅政嘗掌臬司事三日間出濫繫二百餘人居鄉如未嘗有勢位者地方利害嘗陰白有司人或造謝則杜門不見

李春字景陽無爲人正統進士兵科給事中有直聲轉福建叅議汀盜起春親抵巢穴諭降進江西左叅政撫諸洞反側歷兩藩俱著聲績

沈諲合肥人景泰進士歷部郎知東昌府政尚嚴明常祿外不名一錢折獄明允銓注天下廉能官第一

鄭時字宗良舒城人景泰進士任御史以慇直降內鄉知縣薦爲延平守擢撫陝西成化末有挾左道得幸者

時上疏論之陳利國保民五事忤旨降謫復起爲左副都御史轉兵部侍郎晉司寇爲人端厚簡慤鄉評重之王敬字惟瞻廬江人景泰間貢監任大理評事甫視事卽力白三原王恕之冤衆論多之陞本寺副子恒字克昌幼習詹孟舉大書年十二英宗召至御前作天下太平四字擢中書舍人官終戶部郎

鮑德字秉仁舒城人景泰丙子鄉薦知衡山調華容治邑九年興學勸農懲奸理冤治稱湖湘第一仕至饒州同知

吳凱合肥人由進士擢兵科左給事中封駁敷奏動存大體承旨覈邊儲罷武弁不職者四百餘員仕至廣東

少叅

郭鉉合肥人襲彭城衛指揮使成化初進指揮同知弘治中擢總漕運沈毅有智畧凡軍民利病必陳於朝嘗濬通州河置壩令淺船搬運歲省白金數萬筦漕十三年後佐後府卒

薛遠字繼遠無爲人由進士任戶部郎中使交南還進侍郎轉工部治河河南調兵食討兩廣叛獠事平進尚書致仕復起南兵部尚書與中官汪直忤遂歸遠敏而好學於禮樂兵刑天官律曆無不究悉尤熟國家典故在戶部改定事例每歲中外競陳利害一切報罷官省民安從宦四十年家無長物嘗曰少吾事親恒不足今

安忍有餘

葉鸞字應和舒城人景泰進士任貴州叅議黔中雜苗難治鸞廉靜忠誠按部所至蠻人赴愬者多持金馬求直盡却之一斷以法有宣慰剗人腸藩臬諸司莫能糾鸞遣馳諭即謝罪又宣慰有奪嫡者僉允其請鸞獨不肯署名親老授副使終養

秦民悅字邦約舒城人天順進士授行人進工部員外郎裁抑中貴公尅之弊出知廣平府括流移荒地三千五百頃聽民種斂租備賑擢江西叅政累陞戶兵二部尚書卒諡壯簡

張淳合肥人成化進士令瀏陽糧長侵賦鉅萬淳以至誠勸諭並感泣輸完擢御史按貴州用計擒賊渠餘黨五十九寨悉就撫轉吉安知府多善政民為立祠累遷至副都御史

蔚春合肥人弘治進士任兵科給事中陳時政八事邊務七事咸見施行叅議福建叅政廣西以鯁介為忌者中傷乞歸

曹琥字瑞卿巢縣人弘治進士授南工部主事轉戶部御史周廣發太監錢寧事下獄琥論救亦被杖謫判尋甸改黃州遷廣信同知節寧藩貢獻抑守璫橫索請革歲貢芽茶奏最進鞏昌知府未赴卒生平砥礪名節歷官中外家無積儲

江南通志 卷一百一十六
萬振孫字性儒合肥人嘉靖進士服官剛正自部郎知襄陽府舉覈屬令賊過雖賄監司爲解弗釋也陞副楚臬礦使縱橫振孫捕其爪牙立斃之以忤旨削籍起廣東叅政未就卒

劉崙字山甫無爲人嘉靖進士擢御史巡視陝西請查復金牌舊制修舉茶馬八事回按順天疏陳畿輔饑荒疾苦巡撫湖廣會景王之國德安崙營辦有方公私不擾楚人頌之

宛嘉祥字白湖廬江人嘉靖癸卯舉人判廣信遷知思南府招降強寇萬餘朝廷嘉其績令久任思南撫戢餘衆四境帖服

竇子偁合肥人萬曆壬辰進士授大理評事抗疏請建儲守泉州課最督學湖廣大計注廉明第一累遷福建布政使

朱萬春字寰同無爲人萬曆進士知上饒遏璫豎開採之擾省長差拖累之患擢御史劾本兵糾總河論首輔請東宮出閣講學按四川奏留帑金充採辦免加派賑荒災轉江右道平鄱湖劇賊內陞歷左通政

許如蘭字湘畹合肥人萬曆丙辰進士知光州遷工部郎出知紹興舉卓異備兵密雲轉蒲州道密人請留未赴旋命撫薊再撫廣西折悍藩平普莫二賊進副都御

史

趙一韓字如勃巢縣人萬曆進士司李九江時中璫收稅恣爲攫取一韓痛繩以法遷南工部視榷蕪關廉聲比前官葉茂才累晉貴州副使魏璫時能植節自振朱來遠字文甫廬江人萬曆丁丑進士初令秀水除雜差以蘇民禁私販以惠商勸課省刑時稱善治仕至太常少卿引疾歸

楊四知字畏生無爲人崇正戊辰進士知漢陽擢御史陳江北被寇之慘兵將玩寇之弊又上銓政京營漕運及被寇地方求改折色等疏巡視兩關勞瘁卒官

國朝王綱字燕友合肥縣人順治壬辰科進士授刑部郎改兵部督捕逃案山積綱爲振滯獄釋株連冬月流徙出

關者給湯粥衣絮選授巡倉御史終通政左右叅議

李天馥字湘北合肥人順治戊戌科進士授檢討歷工刑兵吏四部尚書以老成清慎拜大學士在相位五年宰物應機一以虛公處之嘗以變法不如守法欲救弊未必無弊奉行故事惟謹不敢失尺寸有古大臣風許明章舒城人順治戊戌科進士授陵水知縣輸賦積弊羨耗幾侷正額賦多逋明章盡除耗羨令民出穀米牛羊雞豚之屬官爲平價鬻之以其值補從前缺額數月而足遷德州同知

沈汝蘭字仲畹巢縣人順治辛卯歲貢司訓泰州海寇薄城協力守禦白諸生之被誣陷者七人

張肯穀字式似巢縣人歲貢任涇陽縣丞遷知神木署
秦州事巴三綱之亂賊衆潛布城中猝發執穀去誘降
穀不屈計給守者得脫奔叩幕府白狀陳進勦策躬爲
嚮導一鼓而三綱授首超遷鳳翔知府轉濟南皆著治
績

湯愛鼎字旺衡巢縣人廩貢訓導靈璧遷知滿城除耗
羨清疆理抑強梁治最擢瓊州守叅劾屬吏貪酷者不
少貸

張國城字宗子舒城人康熙甲辰科進士知高明縣時
多盜國城團練鄉勇禦勦兼施請緩征輸折兵米免夫
役以安集被難之民上官皆從之

陳畧字石友舒城人父魁甲前明壬午寇亂時保護鄉
里收葬骸骨以行義聞畧舉己未武科進士守備蘄州
衛清釐軍民徭役使兩不相擾建鳳麓書院置田養士
以卓異遷興化游擊

朱前詔無爲舉人令長沙均賦稅免差徭勸課農桑軫
恤孤苦陞知麻哈州百姓如失父母

宋元徵字式虞廬江人康熙戊辰科進士知夏津縣廉
明蝗不爲害運河淤漕滯元徵默禱河神卽躬挽大纜
前行水立湧千艘如駛歷官刑部郎中屢決疑獄祀名
宦

胡永亨合肥人父守恒以壬午城陷罵賊死永亨募勇

士夜入賊營收父骸而葬之家居孝友尚義好施康熙
庚戌成進士典試江西公慎自矢號稱得人尋遷民部
郎奉

命鞠粵東獄仁恕得情分巡肇高廉羅道飲冰茹蘗多所釐剔
息事寧人幾於無訟人比之包待制云

鳳陽府

漢召信臣字翁卿壽春人以明經甲科為郎出補穀陽長
舉高第遷上蔡長其治視民如子所居見稱述超為零
陵太守復徵為諫大夫遷南陽太守信臣勤力有方畧
好為民興利務在富之躬耕農桑開通溝瀆以廣灌溉
杜紛爭禁奢靡吏民親愛號之曰召父遷河南太守治

行第一數增秩賜金竟寧中徵為少府列於九卿

陳萬年字幼公相人為郡吏察舉至縣令遷廣陵太守
以高第入為右扶風遷太僕性廉平內行修飭以丙吉
薦代于定國為御史大夫

陳咸字子康萬年子以父任為郎有異材抗直數言事
遷為左曹元帝擢為御史中丞總領州郡奏事課第諸
刺史內執法殿中公卿以下皆敬憚之為石顯奏廢成
帝初補長史遷冀州刺史歷二郡守所至立威豪強讜
服徵入為少府

薛廣德字長卿相人以魯詩教授楚國龔勝舍師事焉
以蕭望之薦遷諫議大夫代貢禹為長信少府遷御史

大夫為人溫雅有蘊藉及為三公直言諫諍始拜旬日
元帝幸甘泉因留射獵廣德上書諫即日還宮復諫御
樓船願自刎以血污車輪上卒從橋後賜安車駟馬東
歸

徐防字謁卿鉅人永平中舉孝廉除為郎體貌矜嚴占
對可觀顯宗異之特補尚書郎職典樞機周密畏慎出
為魏郡太守遷大司農勤曉政事所在有績拜司空防
以五經久遠聖意難明宜為章句以悟後學上疏言博
士及甲乙策試宜從其家章句開五十難以試之解釋
多者為上第引文明者為高說詔書下公卿皆從防言
拜司徒遷太尉錄尚書事封龍鄉侯免就國防卒子衡

當嗣讓其弟崇數歲乃出就爵云

陳寵字昭公浚人少為州郡吏辟司徒鮑昱府掾勤心
物務昱高其能轉為辭曹掌天下獄訟其所平決無不
厭服眾心撰辭訟比七卷公府奉以為法肅宗初為尚
書時吏政尚嚴寵上疏謂宜改前世苛俗務寬厚遂讞
五十餘事著為令是後人俗和平屢有嘉瑞歷二郡三
卿所在著績累官司空

陳忠字伯始寵子永初中為廷尉正以才能有聲稱擢
拜尚書居三公曹雖世典刑法用心寬厚奏上決事比
二十三條以省請讞之敝又奏除蠶室等刑安帝親政
忠以宜徵聘賢才宣助風化數薦隱逸及直道之士又

因災異詔開言路忠慮言事者多激切或至不能容乃上疏豫通帝意後數言時政語多切直中官外戚及近倖咸憚之官至尚書

桓典字公雅沛郡龍亢人榮之元孫焉之孫傳其家業以尚書教授舉孝廉爲郎辟司徒袁隗府拜侍御史是時宦官秉權典執正無所回避常乘驄馬京師畏憚爲之語曰行行且止避驄馬御史及黃巾賊起蒙陽典奉使督軍破賊獻帝卽位三公奏典謀誅閹宦忠義炳著拜御史中丞賜爵關內侯

劉馥字元穎沛國相人漢末曹操表爲揚州刺史單馬造合肥空城建立州治數年恩化大行流民歸者以萬數於是興學校廣屯田治芍陂及茹陂七門吳塘諸埭以溉田又高城壘積木石爲戰守備後吳攻合肥城恃以全

三國魏倉慈字孝仁淮南人太祖開屯田於淮南以慈爲綏集都尉黃初末爲長安令清約有方吏民畏而愛之遷燉煌太守抑挫權右撫恤貧羸歲決刑不滿十人民翕然稱其德惠數年卒於官吏民圖形祀之

劉曄字子陽淮南成憇人許邵稱其有佐世之才太祖辟司空倉曹掾行軍長史兼領軍每有疑事輒以函問至一夜數十至後卒於太中大夫東亭侯諡曰景

劉靖相人馥子仕魏從黃門侍郎爲廬江太守轉河內

遷尚書賜爵關內侯出爲河南尹爲政初雖如碎密久而百姓便之有馥遺風爲大司農衛尉進封廣陸亭侯上疏陳儒訓之本後遷鎮北將軍都督河北諸軍事開拓邊守屯據險要修渠灌田邊民利之薨進封建成鄉侯諡曰景

胡質字文德楚國壽春人仕魏初爲頓邱令後徙吏部郎爲東莞太守平反獄情在郡九年吏民便安遷荊州刺史加振威將軍解樊城之圍遷征東將軍假節都督青徐諸軍事廣農積穀有兼年之儲又通渠諸郡利舟楫嚴設備以待敵海邊無事性沈實內察不以其節檢物所在見思薨家無餘財追封陽陵亭侯諡曰貞

〔吳〕薛綜字敬文沛郡竹邑人仕吳爲五官中郎除合浦交趾太守建昌侯慮爲大將軍以綜爲長史外掌衆事內授書籍慮卒入爲尚書僕射時權欲親征公孫淵綜上疏諫止之徙選曹尚書太子少傅以名儒居師傅之位仍兼選舉甚爲優重凡所著詩賦難論數萬言名曰私載又定五宗圖述二京解皆傳於世

魯肅字子敬臨淮東城人家富於財好施與以賑貧結士爲務周瑜爲居巢長求資糧於肅肅家有兩困米各三千斛肅指一困與之遂相親結瑜薦肅於孫權與語大悅因說權鼎足江東以觀天下之釁曹操旣入荊州圖東下諸將皆勸權迎操肅獨勸權召周瑜任之與劉

備併力破操於赤壁後以奮武校尉代瑜鎮江陵尋拜漢昌太守偏將軍從權破皖城轉橫江將軍子淑永安中爲昭武將軍都亭侯武昌督遷夏口督所在嚴整有才幹卒子睦襲爵領兵馬

蔣欽字公奕九江壽春人從孫策東渡拜別部司馬討平盜賊歷官討越中郎將從權征合肥力戰有功遷盪寇將軍領濡須督後召還都拜津右護軍典領詞訟權嘗入其堂內母踈帳縹被妻妾布裙權嘉其在貴守約勅御府以錦繡易之初屯宣城蕪湖令徐盛收欽屯吏表斬之權不許盛由是自嫌常畏欽害已而欽每稱其善盛旣服德論者美焉子壹封宣城侯與魏戰臨陣卒

無子弟休領兵

晉武陔字元夏沛國竹邑人父周與二弟韶茂並總角知名仕魏累官太僕卿封薛縣侯晉泰始初拜尚書遷僕射開府儀同三司陔以宿齒舊臣名位隆重自以無佐命之功又在魏已爲大臣不得已而居位深懷遜讓終始全潔當世以爲美談卒諡曰定子輔嗣韶歷吏部郎太子右衛率散騎常侍茂以德素稱名亞於陔官侍中尚書爲荀愷所陷遂見害天下傷焉侍中傅祗上表申之後追贈光祿勳

袁甫字公胄淮南人好學與華譚齊名以詞辨稱嘗詣中領軍何勗自言能爲劇縣除松滋令轉淮南國大農

劉弘字和季沛國相人靖子有幹畧政事之才累官鎮南將軍都督荊州諸軍事屢平反側勸課農桑寬刑省賦每有興廢手書守相丁寧欵密人皆感悅爭赴之咸曰得劉公一紙書賢於十部從事及卒士女嗟痛若喪所親後南夏亂父老追思弘雖甘棠之詠召伯無以過也贈新城郡公諡曰元子蟠追遵父志斬郭勤於濁水爲順陽內史江漢之間翕然歸心

胡威字伯武壽春人質子早厲志尚爲徐州刺史勤於政術風化大行入朝武帝謂威曰卿孰與父清對曰臣父清恐人知臣清恐人不知臣不及遠也歷官前將軍青州刺史以功封平春侯卒贈鎮東將軍諡曰烈子奕

嗣奕字次孫仕至平東將軍威弟羆字季象亦有幹用仕至益州刺史安東將軍

劉惔字真長沛國相人祖宏字終嘏宏兄粹字純嘏宏弟演字冲嘏並有名中朝時人語曰洛中雅雅有三嘏父耽晉陵太守亦知名惔少清遠有標寄王導深器之論者比之荀粲累遷丹陽尹爲政清整每奇亘温才而知其有不臣之迹及温爲荊州惔言於帝曰温不可使居形勝地其位號常宜抑之帝不納年三十六卒孫綽爲之誄云居官無官官之迹處事無事事之心時人以爲名言

桓宣譙國鉅人祖詡義王太守父弼冠軍長史宣初爲

元帝丞相舍人時張平樊雅各據一城帝以宣爲叅軍使就平雅平雅卽遣使隨宣受節度王含請宣爲叅軍使率衆救祖逖逖留宣討諸未服皆破之陶侃使宣鎮襄陽宣招懷初附勸課農桑簡刑罰畧威儀十餘年間石季龍再遣騎攻之宣能得衆心每以寡弱距守論者以爲次於祖逖庾翼爲荊州欲傾國北討更以宣爲都督三州四郡軍事以功封竟陵縣男卒贈鎮南將軍子戎官至新野太守

桓伊字叔夏宣族子父景有當世才仕至侍中丹陽尹長社侯伊有武幹累遷大司馬叅軍時苻堅強盛邊鄙多虞授伊淮南歷陽太守與謝元共破賊別將王鑿張

蚝進都督豫州諸軍事及苻堅南寇伊與謝元謝琰俱破堅於肥水以功封永修縣侯在州十年綏撫荒雜甚得物情桓沖卒遷都督江州荊州十郡豫州四郡軍事伊到鎮以寬恤爲務百姓賴焉卒官贈右將軍官散騎常侍諡曰烈子肅之嗣卒子陵嗣伊弟不才亦有將畧討孫恩至冠軍將軍

桓沖字幼子彝季子淹識有武幹從溫征伐有功官寧朔將軍義成新野二郡太守又從溫破姚襄及虜周成賜爵豐城公遷振威將軍江州刺史後代溫居任盡忠王室謝安以時望輔政沖懼逼乃解揚州自求外出以徐州刺史鎮京口尋都督江荆梁益寧交廣七州軍事

荆州刺史冲率前將軍劉波等伐苻堅拔堅筑陽攻武當走堅兗州刺史張崇尋領江州使石虔伐堅襄陽太守閻震擒之以功封次子謙宜陽侯又降堅魏興上庸新城三郡卒贈太尉諡宣穆

〔南北朝〕宋鄭黑壽陽人仕宋爲豫州刺史殷琰叛黑起兵淮上捍之遷司州刺史

趙倫之字幼成下邳僮人宋武帝起兵以軍功封閬中縣五等侯武帝北伐倫之遣順陽太守傅弘之扶風太守沈囀子出嶢柳大破姚弘於藍田後以佐命功更封霄城縣侯安北將軍少帝卽位徵拜護軍尋遷光祿大夫卒子伯符嗣

〔梁〕裴邃字淵明祖壽孫由河東徙居壽陽刺史裴叔業以壽陽降魏隨衆北徙天監初邃自拔還梁求邊境自効以爲輔國將軍廬江太守屢破魏軍以功封夷陵縣子遷廣陵太守及梁秦二州刺史開創屯田倉廩盈實省息邊運民吏獲安與魏壽陽守將拒戰卒於軍諡曰烈邃深沈有思畧爲政寬明能得士心居身方正將吏憚之及其卒也淮肥間莫不流涕子之禮字子義累官都督北徐仁睢三州諸軍事信武將軍卒諡曰壯

〔後周〕裴政字德表邃孫家壽陽幼明敏博聞強記達於從政仕梁封夷陵侯周師圍荊州政間道赴難周人獲之蕭詧命至城下使謂元帝曰王僧辨已自爲帝王琳不

復能來政詭許之既而告城中曰援兵大至吾當以碎身報國江陵平周文帝聞其忠授員外散騎侍郎命與盧辨依周禮建六卿撰次朝儀多遵古法尋授刑部用法寬平後出爲襄州總管令行禁止稱爲神明卒官年八十九

隋樊叔畧陳留人仕周累遷驃騎大將軍從武帝伐齊每戰身先士卒以功封清鄉縣公拜汴州刺史隋文帝受禪進爵安定郡公在州數年甚有稱譽遷相州刺史政爲當時第一百姓爲之語曰智無窮清鄉公上下正樊安定徵拜司農卿凡種植叔畧別爲條制皆出人意表卒贈亳州刺史諡曰襄

唐裴懷古壽春人爲監察御史姚萇道蠻反命懷古懷古之申明誅賞歸者日千人遂定南方使突厥默啜欲官懷古不屈將殺之懷古亡歸遷祠部員外郎歷官幽州都督所至吏民懷愛韓琬稱其馭士信臨財廉爲國名將云

宋高覲字會之宿州蘄人進士起家歷遷戶部判官京西轉運使徙益州彭州廣碕麗水二峽地出金宦者挾富人請置場募人夫採取之覲曰聚衆山谷間與夷獠雜處非遠方所宜奏罷之累官給事中子秉常爲梓州路轉運使

閻日新宿州臨渙人少爲本州牙職補三司使役吏景

德初命管勾邠寧環州駐泊兵馬時部署張凝屢入邊界焚族帳日新皆提兵應援大中祥符初改文思使日新起胥吏好云爲以進取多所建白累官昭州團練使歷知單州

呂夷簡字坦夫先世萊州人祖龜祥知壽州子孫遂家焉夷簡進士及第累遷尚書祠部員外郎時京師大建宮觀工役至有死者夷簡奏緩其役真宗謂其有爲國愛民之心仁宗卽位以給事中叅知政事尋拜同中書門下平章事章懿太后薨夷簡請發哀成服備儀仗葬之徙許國公感風眩仁宗降手詔云古謂髡可療疾今剪以賜卿旣薨帝泣曰安得憂國忘身如夷簡者贈太

師謚文靖夷簡當國柄最久其於天下事屈伸舒卷動有操術後配食仁宗廟爲世名相

呂公綽字仲祐夷簡子蔭補將作監丞遷尚書員外郎爲史館修撰判太常寺考定禘祫時祭之禮爲郊祀總儀上之改樞密直學士知泰州古渭州諸羌來獻地公綽郤之不受進翰林侍讀學士卒贈左諫議大夫

呂公弼字寶臣夷簡子賜進士出身積遷直史館河北轉運使自寶元慶曆以後宿師備邊旣撤警而將屯如故民疲餽餉公弼始通御河漕粟實塞下冶鐵以助經費舒冗賦及民逋數百萬夷簡歿仁宗識公弼名於殿柱至是益材其爲人謂宰相曰公弼甚似其父知成都

府寬而有斷軍府肅然代蔡襄爲三司使神宗立王安石嫌其不附已公弼立上章避位卒謚惠穆

呂公孺字稚卿賜進士出身占對詳敏仁宗以爲可用爲開封府推官民鬻薪爲盜所奪逐之被傷尹包拯命笞盜公孺曰盜而傷主法不止笞執不從拯善其守及使三司而公孺爲判官事皆咨決之元豐初知永興軍洛口兵千人以久役思歸奮斧鍤排關不得入公孺索首亂者黥之餘悉慰遣後累官戶部尚書卒

呂希哲字原明公著長子少從焦千之孫復石介胡瑗學復從程顥程頤張載游聞見由是益廣以蔭入官王安石將置其子雱於講官以希哲有賢名欲先用之希

哲辭曰辱公相知久萬一從仕將不免異同則疇昔相與之意盡矣安石乃止范祖禹言於哲宗曰希哲經術操行宜備勸講其父嘗稱爲不欺暗室詔以爲崇政殿說書勸導人主以修身爲本修身以正心誠意爲本遭崇寧黨禍奪職罷爲宮祠驛寓淮泗間十餘年卒希哲樂易簡儉有至行晚年名益重遠近皆師尊之

呂希純字子進公著次子登第爲太常博士元祐祀明堂將用皇祐故事希純言宜循元豐間式以英宗配上帝悉罷從祀羣神得嚴父之義從之又請定納后昏禮拜中書舍人同修國史入崇寧黨籍累貶官

苗時中字子居其先徙居宿州以蔭主寧陵簿有善政

熙寧中爲梓州轉運副使韓存寶討蠻軍行時中以糧道遠創爲摺運法食以不乏加寶文閣待制終戶部侍郎

魏杞字南夫壽春人紹興十二年登進士第累遷宗正少卿湯思退建和議命杞爲通問使損歲幣五萬歸以使不辱命一歲至相位卒諡文節

呂好問字舜徒希哲子以陰補官崇寧初治黨事坐廢蔡卞得政諷之曰少親我卽階顯列好問笑不答靖康元年歷擢御史中丞徽宗將內禪詔解黨禁除新法蔡京黨戚莫肯行好問抗疏言利害欽宗鄉納又疏蔡京過惡乞投海外請削王安石王爵前後數十上帝雖當

食輒使畢其說高宗南渡好問諭張邦昌奉傳國璽遣使勸進高宗勞之曰宗廟獲全卿之力也以恩封東萊郡侯子本中揆中弼中用中忱中孫祖謙祖儉

王希呂字仲行宿州人渡江後自北歸南登進士科除右正言時張說以攀援戚屬擢用希呂上章劾之見斥直聲聞遠邇淮右擇帥令知廬州兼安撫使修葺城守安集流散兵民賴之改知紹興府百廢具興尤敦禮文學端方之士天性剛勁遇利害無回護意居官廉潔至無屋可廬上聞之賜錢造第

董槐字庭植濠州定遠人少喜言兵自方諸葛亮周瑜旣而從學於輔廣廣歎其善學登進士爲廣德軍錄事

江南通志 卷一百四十五
三
叅軍雪富人李桷獄嘉熙中知江州兼都督府叅軍流
民渡江而來者數萬發粟賑之至者如歸淳祐二年遷
左司郎兼知江州主管江西安撫司典利除害惟恐不
盡徙廣西運判兼提點刑獄至邕州上守禦七策南方
悉定累封許國公一日值天大雨烈風雷電槐衣冠起
坐麾婦人出爲諸生講兌謙二卦遂薨贈太子少師諡
文清

元張郁靈璧人登至元進士歷官三十餘年不苟取於民
至叅知政事而接人以謙私居必冠帶

明李善長字百室定遠人太祖起兵善長被儒服道謁上
與語取天下大計意合留幕贊軍機積資至左相國章

程賞罰悉善長處分凡師行必善長留守轉調軍餉無
乏太祖卽位凡制度皆善長所定以其功大比漢蕭何
封韓國公後坐胡惟庸事死

徐達字天德濠人少負大志太祖爲郭子興部帥仗劍
往從一見語合時時以王霸之畧進上知爲國器委使
必効征討所至成功與常遇春皆軍鋒冠而達尤不嗜
殺平張士誠吳人安堵如故入元都市不易肆出佩大
將軍印歸朝上符印單車垂囊還邸舍延儒生講議恂
恂恭謹以功名終封魏國公卒追封中山王諡武寧

鄧愈虹縣人從太祖定金陵有功每戰必先登陷陣取
州郡卽令鎮守歷廣德宣徽嚴饒撫南昌襄陽所至撫

以恩信後從大將軍北定中原封衛國公卒追封寧河
王諡武順

繆大亨定遠人初糾義兵爲元攻濠不克歸附歷官同
僉樞密院事總制揚州鎮江有治畧爲政寬簡軍民皆
悅之及卒上遣祭其墓曰繆將軍平生端直諸將中未
嘗有過

郁新字敦本臨淮人洪武中由人材除戶部度支主事
進郎中超遷戶部侍郎上問天下戶口漕運地理險易
應對無少誤進尚書永樂初卒新理邦賦十三年長於
綜核密而不繁帝悼之賜祭葬

張德林鳳陽人明初以元帥守揚州時兵火之餘城中

居民僅十餘家德林招集流亡戶口日繁威肅惠懷軍
民輯睦

唐鐸字振之虹縣人太祖初起兵卽侍左右歷官兵部
尚書上謂其謹厚有德特以爲詹事食尚書俸後參征
南軍相度形勢增設衛所皆從之鐸居官廉靜不妄取
予爲上所重

單安仁字德夫濠人元末歸太祖爲元帥守鎮江移常
州歷工部尚書精敏多智諸所營造大小中程改兵部
尚書致仕奏請䟽濬儀徵縣南壩以便輸輓疏轉運河
以防淤淺移瓜洲倉廩置洋子橋西免大江風潮之患
家居二十年卒年八十五

郭景祥濠人博涉書史性直諒遇事敢言太祖甚親信之為右司郎中授和州總制治城隍樓櫓廣屯田練士卒和遂為重鎮仕終浙江行省叅政

王濂字習古定遠人李善長婦兄元時為吏令長皆賓禮之聞太祖克集慶來歸除執法官讞獄平允歷浙江按察僉事治行著聞卒上深痛曰濂有王佐才今死朕失一臂

毛騏字國祥定遠人太祖自濠趨定遠與騏籌兵事悉當意擢行省郎中文書機密皆協贊之病卒上親製祭文子驤歷官都督僉事

楊冀安靈璧人洪武初官工部侍郎奉使雲南著有異

績

尹綬字廷章定遠人洪武丙子鄉薦任御史舉刺無所顧忌永樂初使海外歸歷數萬里山川島嶼悉繪圖以獻

張貫靈璧人洪武中監生歷任至北平叅議永樂中改北平為順天府貫首為府尹為政嚴明不阿權勢卒於官

馬世熊臨淮人累官至營田使卒於官太祖親為文祭之

趙畿字邦翰宿州人鄉舉卒業成均仕金華司李發奸如神

江南通志 卷一百四
陳璇字汝衡定遠人永樂辛丑進士除御史巡按浙江
廣西所至肅然歷浙江按察使益廉介自持貪墨斂跡
李默字思道定遠人洪武丙子鄉貢永樂中上書言事
朝廷奇其才擢漢王府長史王有異志默苦諫王怒禁
錮之事敗默尚繫獄特釋還鄉里

年富字大有懷遠人正統間由鄉薦歷仕陝西叅政奏
罷織馳旣定賦額汰冗卒盡革宿弊聲震關中遷河南
布政時流民十數萬聚南陽陳州間剽掠爲盜富至皆
撫定之景泰初擢副都御史巡撫大同一意拊循奏劾
無所避天順間晉戶部尚書上謂掌國計須用執法人
非富不可由是部事大治成化初爲吏部尚書王翱所

劾發憤卒上震悼謚恭定

戴昂字時舉宿州人正統戊辰進士爲御史以言事謫
相口驛丞遷知濉縣在任九載守法奉公民不忍欺

張僖靈璧人景泰甲戌進士授御史歷知杭州府歲饑
賑濟活六萬餘戶終湖廣叅政未行卒杭人祠祀之

湯蘊字用之壽州人成化乙未進士由行人擢御史孝
宗卽位首劾大學士萬安罔上悞國又劾少傅劉吉奸
貪時言路大開蘊意氣尤銳大臣多畏其抨擊而吉尤
不能堪嗾御史論之成肅州至謝遷柄政始釋歸

王昶靈璧人成化丙戌進士知樂安縣有淫祠數十令
毀之適有火患民懼不敢毀昶乃自往碎其妖神火患

亦息歲凶以便宜發粟賑濟擢御史劾李孜省終太僕少卿

劉福字宗慶臨淮人成化甲午鄉薦任兗州府管泉同知弘治間河決張秋福奉檄塞河以死勤事祠祀安平鎮

顧佐字良弼臨淮人成化己丑進士歷官左都御史勸罷總兵官李杲太監任良等以戶部侍郎理陝西軍食善區畫儲蓄餘三年正德初劉瑾逐戶部尚書韓文上以佐代忤瑾乞歸卒贈太子太保

周鉞字仲威宿州人弘治己未進士知永興縣報最劉瑾招之見曰吾力能授爾御史鉞不往遂改進賢教諭尋復公安知縣稱疾不起

李心學字師顏臨淮人嘉靖丁未進士歷官湖廣兵備副使勦平猺賊及容山景洞巨寇擢布政使

余翺字大振定遠人第進士歷監察御史嘉靖三年議大禮翺首率諸御史疏爭忤旨予杖戍邊皇子生始赦還

梁子琦字汝珍壽州人嘉靖乙丑進士授諸暨縣尹愛士恤民興廢舉墜終通政司叅議

劉繼文靈璧人嘉靖壬戌進士歷官給諫章奏激切大著直聲出為浙江叅政與海瑞齊名巡撫廣西總制兩廣殲海寇有功擢戶部左侍郎

楊應聘字行可懷遠人萬曆癸未進士官光祿卿總督西陲邊政大治

夏之鳳字子鳴壽州人萬曆戊子鄉薦歷官戶部郎中時有內豎白玉犯法潛避深宮鳳入奏勅玉出聽審上嘉其正直書名於屏

戈尚友字善卿臨淮人萬曆壬子鄉薦知饒平縣地產毒草能殺人民多借以興訟尚友令犯科者移草投海井中以贖罪後海寇至取水飲死者過半率遁去歷官昌平兵備副使

周汝昌字文明懷遠人官戶部主事性剛正以不肯建生祠忤魏璫戍肅州

高越鳳陽縣人舉於鄉署福山教諭值流賊猖獗縣令棄城遁越率士卒誓死禦城遂以功超拜御史

國朝丁珩字朗山宿州人歷官戶部郎中遷漢興道正己率屬一郡肅然歲饑借倉穀數千石賑之全活甚多及卒士民號泣若喪所親

劉允謙壽州人順治丁亥進士知沈邱縣居官方止擢山東巡按彰善癉惡六府澄清

田家修字獻之鳳陽人順治間知廣東從化縣時邑多流亡盜賊並起乃諭降十餘寨勸令開墾復爲良民編戶清役省刑簡訟衆皆樂業擢西城兵馬指揮

沈時鳳陽人隨征入粵授永安令爲人耿介方正剔蠹

釐奸吏民懾服順治四年秋流賊攻城親冒矢石築子城造雲車以禦衝突閱三月援兵至圍解擢知潮州府歷糧儲驛傳道所至民懷其德

楊模聖懷遠人順治間第進士歷官廉州知府時土弁縱橫模聖單騎招降劇寇安輯遺民去任士民有泣送者

江南通志卷一百四十九終

